

Umiarsualivimmiinnermut akileraarutit pillugit Inatsisartut inatsisaata allanngortinnera pillugu Inatsisartut inatsisaat (Umiarsuarni takornarianik angallassisuni ilaasut akileraarutaannik atuutilersitseqqinneq)

§ 1

Umiarsualivimmiinnermut akileraarutit pillugit Inatsisartut inatsisaanni nr. 20, 30. oktober 1992-imeersumi ilaatigut Inatsisartut inatsisaatigut nr. 14, 28. oktober 1993-imeersukkut, Inatsisartut inatsisaatigut nr. 1, 20. maj 1998-imeersukkut, Inatsisartut inatsisaatigut nr. 2, 21. maj 2002-meersukkut, Inatsisartut inatsisaatigut nr. 3, 27. marts 2006-imeersukkut kingusinnerusukkullu Inatsisartut inatsisaatigut nr. 14, 3. juni 2015-imeersukkut allanngortinneqartumi imatut allannguisoqarpoq:

1. Inatsit imatut taaguuteqartinneqassaaq: "Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit Inatsisartut inatsisaat".

2. § 1, imm. 1, imatut oqaasertalerneqassaaq:

" Umiarsuit nunalinneranni umiarsualiviilluunniit avataanni kisarneranni aamma Kalaallit Nunaanni kisarfimmut tikinneranni umiarsualivimmiinnermut aamma umiarsuarni takornarianik angallassisuni ilaasut akileraarutit Nunatta Karsianut akiliisassapput, tak. §§ 1 a aamma 1 b."

3. § 1, imm. 2, atorunnaarsinneqarpoq.

4. § 1-ip kingorna ilanngunneqassaaq:

" § 1 a. Umiarsuit tamarmik umiarsualivimmiinnermut akileraarutit akiliisassapput, taamaattoorli takuuk § 2.

§ 1 b. Umiarsuit takornariartaatit tamarmik § 1a, taamaattoq § 2 naapertorlugu umiarsualivimmiinnermut akileraarummut tapitut ilaasut tamarmik amerlassusaat malillugit nunalinerit tamaasa ataasiarlutik ilaasunut akitsuummik akiliisassapput. Ilaasunut akitsuut ilaasumut ataatsimut 50 kr.-nik annertussuseqarpoq.

Imm. 2. Ukiumut aningaasanut inatsiseqarfiusumut 2025-mut taassumalu kingorna umiarsuarnut takornariartaatinut ilaasunut akiliut aningaasanut inatsimmi oqaasertaliussakkut allanngortinneqarsinnaavoq.

§ 1 c. Umiarsuarni takornariartaatini ilaasut umiarsualivimmi umiarsualiviullu avataani, tassunga ilanngullugu sineriammi pinngortitamilu niunnginneranni, kommune avatangiisinut aserfallatsaaliuinemullu umiarsuarni takornariartaatini ilaasumut ataatsimut annertunerpaamik 50 kr.-nik akiligassanik aalajangiinissamut piginnaatinneqarpoq. Akileraarut nunaligussinermi umiarsuup takornariartaatip ilaasui tunngavigalugit, nunaligunneqartut amerlassusai apeqqutaatinngit, naatsorsorneqassaaq. Kommunip sumiiffiit attuumassutillit tamakku toqqassavai, aamma ukiup siuliani akileraartarnermut aqutsisoqarfimmut kingusinnerpaamik 1. oktobarimi nalunaarutigineqartussat akiligassat annertussusaat taakkununga atasut aalajangersassallugit.”

5. § 2 Imatut oqaasertalerneqassaaq:

” § 2. §§ 1 a aamma 1 b malillugu akileraaruteqartussaataaangillat aamma 1 c malillugu akiliutinik akiliisinneqartussaangillat:

- 1) Angallatit aalisariutit Kalaallit Nunaanni angerlarsimaffeqartutut nalunaarsorneqarsimasut.
- 2) Angallatit aalisariutit Kalaallit Nunaanni aalisarnermik suliffeqarfimmit attartorneqartut.
- 3) Umiarsuit 200 bruttotonimit (BT) minnerusumik angissuseqartut Kalaallit Nunaanni angerlarsimaffeqartutut nalunaarsornikut.
- 4) Niuerfimmi atugaanngitsut sorsuutit danskinit nunanillu allanit pigineqartut, kiisalu danskit nunallu allat naalagaaffisa umiarsuaataat.
- 5) Umiarsuit Namminersornerullutik Oqartussat ingerlatsiviinit, Kalaallit Nunaanni kommunimit imaluunniit danskit naalagaaffiannit pigineqartut attartorneqartulluunniit.
- 6) Umiarsuit aseruatersimasut usimik allagartaat malillugit umiarsualivimmut pineqartumut nunalittussaangikkaluartut.
- 7) Umiarsuit taamaallaat pujorsuutiminnik aaqqiiniarlutik, nakorsamik atorfissaqartitsillutik, inuttatik taarsissallugit, imaluunniit napparsimasunik, toqusunik imaluunniit umiusimasunik imaluunniit imaani umiarsuarmut ikisaminnik imaluunniit ilisimasortamik niusiartorlutik umiarsualivimmut nunalinniartut.
- 8) Umiarsuit taamaallaat ilisimasassarsiornermut imaluunniit ikiuiniarnermut atorneqartartut.
- 9) Umiarsuit nunaqarfinnik isorliunerusunillu pilersuineri aalajangersimasunik ingerlaarfeqartut.
- 10) Ilaasartaatit umiarsuaatileqatigiiffinnit Kalaallit Nunaanni Namminersorlutik Oqartussanut sullissinissamik isumaqatigiissuteqartunit pigineqartut.
- 11) Umiarsuit Kalaallit Nunaanni aalajangersimasumik inissinneqartut, taamaallaat umiarsuartut annanniutitut, kalittaatitut, siorartaatitut, ujaqqanik qalluutitut, aqqartartut umiarsuaattut prammitulluunniit atorneqartut.
- 12) Umiarsuit Kalaallit Nunaanni nunami suliffissuarmi tunisassiornissaq siunertaralugu aalisakkanik imaluunniit aalisakkanit tunisassianik Danmarkimi, Savalimmiuni nunaniluunniit allani pisianik usingiartut.
- 13) Umiarsuit nunaqarfinni avinngarusimasunilu aalisakkanik aalisakkaniillu tunisassianik pisiortortut.
- 14) Umiarsuit taamaallaat uuliamik uuliamillu tunisassianik assartuisut.

Imm. 2. Umiarsuit umiarsualivimmut 1-imut arlalinniluunniit aalajangersimasumik angalasut § 1 b malillugu akileraaruteqartussaataaangillat aamma 1 c malillugu akiliutinik akiliisinneqartussaangillat.”

6. § 3, imm. 1, imatut oqaasertalerneqassaaq:

” Akileraarut akit uku malillugit bruttotonimut ataatsimut (BT-mut) naatsorsorneqassapput, taamaattorli minnerpaatut 70 BT-mut:

- 1) Umiarsuup bruttotonia 30.000 BT-nik qaangiisimassanngippat umiarsuit takornariartaatit ullup unnuallu aallartinnerinut ataasiakkaanut tamanut 1 kr. 10 øre. Umiarsuup BT-a 30.000-iuppat imaluunniit sinnersimassappagu akitsuut ullormut unnuamullu aallartittunut ataasiakkaanut tamanut tassaassaaq BT-kkaanut tamanut 2 kr. 20 øre, taamaattorli takuuk imm. 2.
- 2) Ilaasartaatit ullup unnuallu aallartinneranut 0 kr. 70 øre.
- 3) Aalisariutit Danmarkimi, Savalimmiuni nunaniluunniit allani angerlarsimaffeqartutut nalunaarsorneqarnikut ullup unnuallu aallartinneranut 0 kr. 70 øre.
- 4) Umiarsuit nassiussanik assartutit umiarsuillu allat sapaatip akunnerata aallartinneranut 0 kr. 70 øre.”

7. § 3, imm. 2 imatut oqaasertalerneqassaaq:

” Imm. 2. Umiarsuit takornariartaatit Nuummi umiarsualivimmut tikinneranni imm. 1, nr. 1-imi akileraarutini akigititat atorneqanngillat. Umiarsuaq takornariartaat 30.000 BT sinnerlugu oqimaassuseqanngippat akileraarut tassaassaaq 0 kr. Umiarsuup BT-a 30.000-iussappat imaluunniit qaangersimassappagu akileraarut ullormut unnuamullu aallartitanut ataasiakkaanut tamanut tassaassaaq BT-kkaanut 0 kr. 70 øre.”

8. § 4 imatut oqaasertalerneqassaaq:

” § 4. § 1 a malillugu naatsorsuinermi tunngaviup naatsorsornerani BT kisitsisinut ilivitsunut qaninnernut ammut akunnaallisinneqassaaq.”

9. § 5 imatut oqaasertalerneqassaaq:

” § 5. § 1 b malillugu akileraarutit akilerneqartussat umiarsuup tulanneranit ilaasut amerlassusaat pillugit paasissutissanik, umiarsualiviulluunniit avataani kisarneranit imaluunniit kisarfimmut tulanneranit tunngaveqartillugit aalajangerneqassapput. § 1 a malillugu akileraarutit akilerneqartussat aamma § 1 c malillugu akiliutit akilerneqartussat kingusinnerpaamik umiarsuup umiarsualivimmit imaluunniit kisarfimmit aallarnerani aalajangerneqassapput.

Imm. 2. Umiarsuup naalagaata, isumaqatiginninniartartuata, imaluunniit agentiaata kingusinnerpaamik umiarsualivimmit kisarfimmilluunniit aallarnermi akileraaruseriffiup atugassaatut, akuersisummik ilaqartillugit, akileraarutit akiligassallu akilerneqartussatut naatsorsorneqartut pillugit elektroniskinnorlugu immersugaq nassiutissavaa. Immersugassaq § 1 c naapertorlugu akiligassanut akilerneqartussanut atugassatut umiarsuup suussusaanik, umiarsuup tonnageanik bruttotonimik (BT-mik) nalunaarneqartunik, umiarsuarnut takornariartaatinut tunngatillugit umiarsualivimmi ullut unnuallu aallartittut piviusutut amerlassusivii, kiisalu sumiiffiit tikinneqartut amerlassusaannik ilaasullu angallammiittut amerlassusaannik immersugassaq paasissutissanik ilaneqassaaq.

Imm. 3. §§ 1 a aamma 1 b akileraarutit akilerneqartussat aamma § 1 c malillugu akiligassat akilerneqartussat umiarsuup umiarsualivimmit kisarfimmilluunniit aallarneranit akiligassanngussapput.

Imm. 4. Akileraarutit akiligassat, akiligassallu akilerneqartussat akiligassanngornikut umiarsualiveqarnermut oqartussanut ullut 14-it qaangiutsinnagit akilerneqassapput.

Imm. 5. Umiarsualiveqarnermut oqartussat qaammammi umiarsualivimmiinnermut aamma umiarsuarni takornarianik angallassisuni ilaasut akileraarutaannik akileeqqusissutinillu piffissaq eqqorlugu nalunaaruteqarfissaat akiliiffissaallu kingulleq tassaavog qaammatip tulluittup ulluisa 15-iat.

Imm. 6. Umiarsuit umiarsualivimmut 1-imut arlalinnulluunniit aalajangersimasumik angalasartut § 1 a malillugu umiarsualimmiinnermut akileraarut pillugu Imm. 3 aamma 4-mi aalajangersagaasunit allaanerumumik akilersueriaaseqarnissamik akileraaruseriffimmut isumaqatigiissusiorsinnaapput. Umiarsuit umiarsualivimmut 1-imut arlalinnulluunniit aalajangersimasumik angalasartut 1b malillugu akileraartussaataaangillat aamma 1c, malillugu akitsuutininik akiliissanngillat, tak. § 2, imm. 2.

Imm. 7. Ukiumi pisartut naammassereernerisa kingorna akileraaruseriffiup avatangiisinut aserfallatsaaliuinnermullu akiliutinit isertitat, takuuk § 1 c, kommuninut ukiumut ataasiarluni naatsorsoriarlugit akilertassavai.”

10. § 6 imatut oqaasertalerneqassaaq:

” **§ 6.** Akileraarutit akiligassat, akiligassallu akilerneqartussat umiarsuup akiligassai naatsorsorneqarsinnaanngippata akileraaruseriffiup akileraarutit akiligassat, akiligassallu akilerneqartussat missingiillutik annertussusilersinnaavaat.”

11. § 10 imatut oqaasertalerneqassaaq:

” **§ 10.** Inatsisartut inatsisaat manna malillugu akileraarutininik akiligassanik, akitsuutininik akileeqqusissutininik, aamma akiliissutissanngortitat akilernissaannut assigiittut pineqarlutik umiarsuaatilik, piginnittoq, attartuisoq aamma pisortaasoq akiliisussaapput. Akiliisoqannginnerani akileeqqusissutip kingornatigut taassuminnga akiliisitsiniarnissaa siunertaralugu akileraartarnermut allattoqarfimmut tamatuma nalunaarutiginnissaanut umiarsualiveqarfimmi oqartussaasoqarfik pisussaaffeqarpoq.”

12. § 11 imatut oqaasertalerneqassaaq:

” **§ 11.** Naalakkersuisut akiligassat kinguaattoorutit akilerneqanngippata, akileraarutit, akiligassat pillaaammillu akiligassiissutit suliamillu suliarinninnermut aningaasartuutit akilerneqarnissaasa imaluunniit akiligassat qularnaveeqqusernissaasa tungaanut umiarsuit Kalaallit Nunaanni umiarsualivinnut tulannissaat itigartissinnaavaat.”

13. § 12 imatut oqaasertalerneqassaaq:

” **§ 12.** Naalakkersuisut Inatsisartut inatsisaata matuma atuutilersinnissaanut uku pillugit malittarisassiorsinnaapput:

Imm. 2. Umiarsualiveqarnermut qitiusumik oqartussat suliffeqarfiit Inatsisartut inatsisaanni akileraarutit ilaasut Nunatta Karsianut kommuninullu akiligassat akilerneqartussat akilersinniarnissaannut taakkulu akileraaruserfimmuteqartussat akilerneqarnissaannut peqqusinissaannik piginnaatitsinissamillu piginnaatissinnaavai.

Imm. 3. Naalakkersuisut najukkami umiarsualiveqarnermut oqartussaataasutut toqqarneqartut qaammatisiutit malillugit ukiut naanerisa kingorna tamaasa ukiumoortumik nalunaaruteqartarnissaannut piumasaaqatiginik aalajangersaasinnaapput. Nalunaarutip suliarineqarneranut aningaasartuutaasinnaasut najukkani, umiarsualiveqarnermut oqartussat toqqarneqartup akilissavaat.

Imm. 4. Naalakkersuisut kommunit avatangiisinut aserfallatsaaliornermullu akiliummit isertitat atuinnissaannut aamma naatsorsuusiornerrannut malittarisassanik aalajangersaasinnaapput. Akiliutip kommunit najugaqarfisami nunallu immikkoortuani takornariartitsinnermut periarfissanik ineriartortitsineq siunertaraa.”

14. § 14, imm. 1, imatut oqaasertalerneqassaaq:

” Kinaluunniit piaaraluni mianersuaalliorujussuarluniluunniit makku pillugit akiliisinneqarsinnaavoq:

1) akitsuutit akiligassallu akilernerqartussat naatsorsorneqarnissaannut taakkualu

nakkutigineqarnissaannut atugassanik eqqunngitsumik paasinerlunneqarsinnaasumilluunniit

paasissutissiisooq imaluunniit paasissutissanik nipangiussiinnartoq, imaluunniit

2) pineqartumut akileraarutinut tunngavigisanik, akiligassanillu akileeqqusissutininik missingersuutigisatut

inissiinerit nalunaarutiginerisa kingornatigut kingusinnerpaamik sapaatip akunneri sisamat

qaangiutinnginneranni akileraarutinut akiliutissat, akiligassanillu akileeqqusinernik inissiinerit

appasippallaarneri pillugit akileraaruseriffimmut nalunaaruteqanngitsoq.”

15. § 14, imm. 2, atorunnaarsinneqarpoq.

Tamatuma kingorna Imm. 3 aamma 4 tassaalissapput Imm. 2 aamma 3.

§ 2

Inatsisartut inatsisaat ulloq 1. december 2023 atuutilissaaq.

Imm. 2. § 1, nr. 1-12, ulloq 1. januar 2024 atuutilissapput.

Namminersorlutik Oqartussat, ulloq 20. novembari 2023

Múte Bourup Egede (atsior.)

Naalakkersuisut Siulittaasuut

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

